

BAB LIMA

BAB LIMA

P E N U T U P

Setelah segala fakta dibentang, dibincang serta dianalisis secara ilmiah dalam bab-bab yang dikemukakan sebelum ini, maka dalam bab terakhir ini akan mengandung kesimpulan dan saranan yang dikira perlu demi kebaikan Islam dan umatnya. Di sini penulis akan berusaha menarik beberapa kesimpulan yang dapat diambil daripada perbincangan terdahulu secara umum, kemudian mengemukakan beberapa saranan untuk kepentingan keilmuan pada masa mendatang.

A. KESIMPULAN

Tafsīr al-Nasafī yang dihasilkan oleh Abū al-Barakāt, °Abd Allāh bin Aḥmad bin Maḥmūd al-Nasafī [m.751H] seorang ulama Hanafi yang terkenal dalam beberapa bidang ilmu iaitu *Fiqh*, *Uṣūl al-Fiqh*, *Uṣūl al-Dīn* dan *Tafsīr al-Qur'ān*. Tafsir ini antara karya tafsir yang sederhana, tidak panjang dan tidak pendek. Ia diringkaskan oleh pengarang daripada dua buah kitab tafsir sebelumnya iaitu kitab *al-Kasysyāf °an Ḥaqā'iq al-Tanzīl wa °Uyūn al-Aqawī l fī wujūh al-Ta'wīl* oleh Abū al-Qāsim, Maḥmūd bin °Umar al-Khawārizmī al-Zamakhsharī [m.538H] dan kitab *Anwār al-Tanzīl wa Asrār al-Ta'wīl* oleh Abū al-Khayr, Nāṣir al-Dīn °Abd Allāh bin °Umar al-Bayḍāwī [m.691H]. Meskipun ia merupakan sebuah kitab ringkasan, namun atas kewibawaan dan kepakaran yang dimiliki Mufasir ini, maka ia tetap muncul sebagai sebuah tafsir yang mempunyai ciri-ciri keistimewaan tersendiri.

Sementara *Tafsīr al-Jalālayn* adalah kitab tafsir yang dihasilkan oleh dua tokoh Mufasir terkenal iaitu Jalāl al-Dīn al-Maḥallī [m.864H] dan Jalāl al-Dīn al-Suyūṭī [m. 911H]. Setelah al-Imām al-Maḥallī yang memulai tulisan ini meninggal dunia, maka ia disempurnakan oleh al-Imām al-Suyūṭī sehingga selesai.

Daripada segi *manhajnya* kedua-dua tafsir ini boleh dikategorikan dalam kelompok *tafsīr bi al-Ra'y al-Jā'iz*, kerana ia tidak banyak terikat dengan metode *tafsīr bi al-Ma'thūr* sepenuhnya. Namun begitu, beberapa aspek utama dalam *tafsīr bi al-Ma'thūr* tidak diabaikan sama sekali, seperti aspek *asbāb al-nuzūl*, tafsir al-Qur'an dengan al-Hadīth.

Hasil daripada kajian ini juga mendapati bahawa kecenderungan ketiga-tiga Mufasir yang menghasilkan dua buah kitab ini adalah untuk melahirkan kitab tafsir yang ringkas dan pendek, tidak banyak menyentuh aspek-aspek sampingan secara lebih mendalam, seperti tata bahasa Arab, Qirā'at dan sebagainya. Hal yang demikian dilakukan berdasarkan keperluan dan tuntutan masyarakat Islam pada ketika itu kepada kitab tafsir yang tidak terlalu panjang menjemukan dan tidak pula terlalu pendek sehingga mencatitkan.

Sepanjang kajian ini pengkaji mendapati beberapa kelemahan yang perlu diberi perhatian serius oleh para pembaca dan perujuk kepada tafsir-tafsir ini antara lain adalah sebagai berikut:

- i. Berkenaan dengan hadits-hadith yang dinukilkan pengarangnya ke dalam tafsir-tafsir ini dipersembahkan dalam bentuk yang amat ringkas. Kadang-kadang tidak disertai dengan nama seorang periwayatpun. Hal yang demikian amat menyulitkan bagi pembaca untuk menentukan kedudukannya sama ada boleh diterima atau sebaliknya. Ada kalanya ia tidak menukilkan *matan* hadits berkenaan sepenuhnya.
- ii. Berkenaan dengan riwayat-riwayat yang berkaitan *asbāb al-nuzūl* juga kadang-kadang dikemukakan dengan lengkap dan kadang-kadang sebaliknya. Hal ini juga boleh menyebabkan tidak jelas maksud ayat berkenaan dan mengelirukan.
- iii. Terdapat kisah-kisah *Isrā'iliyyāt* walaupun tidak terlalu banyak daripada segi kuantitinya berbanding dengan sebahagian tafsir yang lain, namun ia tetap wujud dan tanpa diberi sebarang ingatan serta kritikan terutama apa yang terdapat di dalam *Tafsīr al-Jalālayn*.

Daripada aspek kajian perbandingan dapatlah dirumuskan sebagai berikut:

- i. *Isu Huruf al-Muqatta'ah*
 - a. al-Nasafī mentafsir sebahagian huruf-huruf *tahajji* dengan pelbagai pandangan akal dan meninggalkan sebahagian yang lain.
 - b. Al-Jalālayn sama sekali tidak mentafsir semua huruf-huruf tersebut pada keseluruhan tempat dalam al-Qur'an.

ii. Isu Permasalahan *Fiqhiyyah*

- a. al-Imām al-Nasafi bersikap lebih cenderung kepada mazhab Hanafi yang menjadi anutannya dalam mentafsirkan ayat-ayat *fiqhiyyah*. Namun begitu, beliau kadang-kadang membawa pendapat-pendapat orang lain, kemudian akhirnya beliau mentarjihkan mazhabnya sendiri.
- b. Al-Imam al-Jalālayn lebih tertutup dalam masalah ini, beliau semata-mata mentafsir ayat-ayat hukum tadi mengikut mazhabnya iaiatu al-Syafi'iyah. Kadang-kadang ada juga dibawa pandangan orang lain sekadar menunjukkan bahawa masalah itu berlaku perbezaan pandangan sahaja.

iii. Isu *Asbab al-Nuzul*

Dalam konteks *Asbāb al-Nuzūl* penulis mendapati kedua-dua tafsir ini tetap memberikan keutaman kepadanya. Cuma daripada segi persembahannya agak kurang memuaskan, kerana masing-masing tidak menyebut *sanad* atau perawinya. Kadang-kadang sesuatu sebab *nuzul* diringkaskan teksnya sekadar untuk memahami ayat berkenaan sahaja. Namun begitu, sebab-sebab *nuzūl* itu masih dapat dirujuk kepada sumbernya daripada kitab *Asbāb al-Nuzūl* oleh al-Wāhidī.

- iv. Isu tafsir al-Qur'an dengan *al-Hadith*
- a. al-Imam al-Nasafi ketika mentafsirkan al-Qur'an dengan al-Hadith kita dapati beliau tidak berhati-hati. Kadang-kadang dicampuradukkan antara *matan* hadith dengan huraianya, dan kadang-kadang ditambah lafaz hadith dengan kata-katanya sendiri. Pada umumnya beliau tidak menyebut *sanad* hadith yang dibawa.
 - b. Seperti juga al-Nasafi, al-Jalālayn tidak membawa *sanad* bagi hadith-hadith yang dibawanya. Beliau umumnya menyebut :
(و في الحديث) begitu sahaja.
- v. Isu Riwayat *Isrā'iliyyāt*
- a. Umumnya riwayat-riwayat *isra'liyyat* yang dibawa oleh masing-masing Mufasir tidak diberi sebarang ulasan, komentar dan ingatan.
 - b. Bagi al-Nasafi, sekiranya riwayat itu menyentuh soal akidah, seumpama kisah yang boleh menjejaskan kemaksuman seorang nabi atau rasul, maka beliau mengkritiknya dengan menyatakan penafiannya. Akan tetapi sebaliknya tidak ada apa-apa komen daripada al-Jalālayn terhadap kisah seumpama itu.

vi. Isu *Ayāt al-Ṣifāt* (sifat-sifat Allah)

Dalam masalah ini kita dapati kedua-dua tafsir yang dikaji, pengarangnya bertindak mentakwilkan semua ayat-ayat berhubungan dengan sifat-sifat Allah. Mereka mengambil pendekatan mazhab khalaf dalam permasalahan ini. Lebih tepat mereka masing-masing mengikut aliran *al-Asyʿariyyah*.

Akan tetapi dalam *Tafsīr al-Jalālayn*, khususnya al-Suyūṭī agak berbeza pandangannya dengan al-Nasafi apabila beliau tidak mentakwilkan dua sifat Allah iaitu sifat *al-Istiwāʾ* dan *al-Ruʾyah*. Sementara lain-lain sifat adalah sama dengan al-Nasafi.

Pada umumnya dapatlah dirumuskan bahawa aspek persamaan antara dua tafsir ini adalah daripada segi *manhajnya* iaitu *manhaj tafsīr bi al-Raʾy al-Mamdūh* dan bercorak *taḥlīlī* serta ringkas. Sementara perbezaanya pula adalah dari segi pendekatan masing-masing terhadap isu-isu seperti *al-Ḥurūf al-Muqattaʿah* dan permasalahan *fiqhiyyah*. Adapun berkenaan isu-isu *asbāb al-Nuzūl*, tafsir al-Qurʾan dengan al-Hadith, riwayat *Isrāʾīliyyāt* dan *Ayāt al-Ṣifāt* pendekatan mereka hampir sama.

B. SARANAN

Berasaskan kepada hasil kajian yang telah dicapai, maka untuk kepentingan ilmu dan kebaikan masyarakat Islam seluruhnya, maka di sini penulis ingin mencadangkan beberapa perkara sebagai berikut:

1. Ulang cetak dengan melakukan tahqiq.

Oleh kerana tafsir ini tersebar secara meluas dalam masyarakat kita, maka alangkah baiknya jika ia diulang cetak yang disertai dengan tahqiq secara ilmiah, demi menjaga para pelajar, pembaca dan guru-guru tidak terkeliru dengan beberapa fakta yang tidak jelas kebenarannya.

2. Mentakhrijkan hadith-hadith

Disebabkan hadith-hadith yang dibawa penulisnya tanpa disertai dengan *sanad* yang boleh dipercayai riwayatnya, maka eloklah hadith-hadith tersebut ditakhrij, kemudian dijelaskan sahih atau da'ifnya.

3. Buat ulasan terhadap fakta yang mengelirukan.

Oleh kerana kedua-dua kitab tafsir ini terlalu ringkas, maka ia patut diberi ulasan dan huraian oleh pihak-pihak yang berautoriti, alim ulama dan pakar dalam bidang tafsir al-Qur'an khususnya. Justeru itu, wajarlah sekiranya *Tafsir al-Jalālayn* digunapakai oleh al-Syaykh Muhammad Abduh dalam kuliahnya, seperti mana dinyatakan oleh al-Zarqāni dalam tulisannya.

Sesungguhnya, tesis ini tidak akan sunyi daripada kelemahan dan kekurangan. Oleh itu, penulis sangat mengharapkan kritikan, tunjuk ajar serta cadangan daripada pemeriksa demi kesempurnaannya. Kepada Allah S.W.T. penulis menyerahkan segala hasil usaha yang kerdil ini. Semoga ianya sentiasa mendapat keredaan-Nya selalu.

Amin, Ya Rabbalalamin.

Wassalam.